

أغنيتي

١

obeikandi.com

obeikandi.com

أم الضفاير (*)

طريقى داير دواير
يا حلوة يا ام الضفاير
حابر وعاشق وصابر
صابر وعاشق وحابر
على صدرى حبك مخضر
ف عيونى صبحك مبدر
وفوق جبيني المقدر
القد ملفوف وفاير
ف عينيكى شوفت البراءة
تفتح لى طاقة وطاقة
علمت قلبى الجراءة
وفتحت كل الستاير
يا قلبى صبحى ومسايا
ما بين رحاية ورحاية
ويحوشوا عنك ندايا
أمد ليكي البصاير
حاسبى يغرك وداعى
مهما يطول ضياعى
من صبرى بغزل شراعى
وليوم لقانا حراير

عمرى المتسيم يريدك
ولا غيرى يفرح بعيدك
قلبي استريح ف إيدك
مع إنه طول عمره طاير
لو يوم زمانى يميل لى
يكبر حنانك ف ضلى
زى البششاير تهلى
وتهلى زى البششاير
طريقى داير دواير
يا حلوة يا أم الضفاير
حابر وعاشق وصابر
صابر وعاشق وحابر

(*) لحن: أحمد منيب ..

غناء: محمد منير.

م المنفى

م المنفى باعت أسألك
أرجع على عرشك ملك
أأمر تطيعى وتسمعى
واروى العطش من منهلك
ف المنفى عايش الاغتراب
رجليا ماشية على التراب
وعينيكي أعلى من السحاب
ف الضلمة بيهم أهتدى
والحب تانى بيبتدى
وسنين حياتى بتنقضى
وانا عن حياتى افضلك
م المنفى باعت أسألك
يا حبيبتى لو يوم تفتحى
باب حبى ليكى وتسمحى
أرجع لقلبك مطرحى
أحكم بإسمك مهجتك
وتاجى ييقى ضحكتك
وحصنى ييقى محبتك
وغنوتى.. ما أجملك
م المنفى باعت أسألك

عودى

عودى

وارتاحى ف حدودى
وانشرى السحر ف وجودى
اخرجى من ذكرياتى
واسكنى عمري اللى آتى
إنطقى أرفض سكاتى
وابتدى رحلة صعودى

عودى

وارتاحى ف حدودى
وانشرى السحر ف وجودى
إفرشى الحب المباح
فتشى تلقى الصباح
نتتشى رغم الجراح
تعصفى واطلق رعودى

عودى

وارتاحى ف حدودى
وانشرى السحر ف وجودى
باسألك إمتى الميعاد
واوصلك رغم البعاد

وامتلك بيكي الوداد
تحلمي بزهرة وعودي
عودي
وارتاحي ف حدودي
وانشري السحر ف وجودي
اخرجي من ذكرياتي
واسكني عمري اللي آتى
إنطقي أرفض سكاتي
وابتدي رحلة صعودي

الأحلام (*)

قلبي يا قلبي يا ابو الأحلام
حب الخير ما تقولش بكام
وارجع للى.. بيخلق واللى
بيرزق واللى.. عينه ما تنام

قلبي يا طاير.. لساك حاير.. بين العتمة وبين النور
لو أحبابك.. خانوا غيابك.. إرمى عذابك يملا بحور
دوس أوجاعك.. خلّى شراعك.. يطوى رياح وجراح وآلام
قلبي يا قلبي يا ابو الأحلام

إوهب نفسك.. للى ينافسك.. واللى يسير وياك ف طريق
لحظة ودك.. نورها يمدك.. واوعى يشدك أى بريق
واياك تكره.. أيها فكرة.. تاخذ ناسك م الأوهام
قلبي يا قلبي يا ابو الأحلام

(*) لحن: أحمد الحجار..

غناء: على الحجار.

أمناء الشجرة

أمناء الشجرة.. كلنا فاكهتها
والفروع خضرة.. فارشة ضلتها..
أمناء الشجرة
وف ليالينا.. المشتية..
خدنا أغصانها.. نور وتدفيه..
حاجة معتبرة
الربيع جالها.. باسها وحضنها
القلوب طرحت.. جوه أحضانها..
ضحكت القمر
يا خريف جيتها.. خدت أوراقها
شوفنا دمعتها.. إمتى عشاقها..
بيجوا م الهجرة
بيجوا يزوروا.. ولا يدوها
زى ما ادبتهم.. الحياة الخضرة..
أمناء الشجرة

تسلم العين اللي حبت (*)

دعوتي ف الفجر يا امه
تسلميلي ف كل ضمة
تسلم العين اللي حبت
تسلم الإيد اللي ربت
يسلم القلب اللي سَمَّى

من آلامك..

كنت أنا وكانت سعادتني..

وابتسامك..

كان شفايا وكان إرادتي..

وبعلامك..

ابتدا خطي يخطي..

والحياة جوايا شبت

تسلم العين اللي حبت

تسلم الإيد اللي ربت

يسلم القلب اللي سَمَّى

علميني
دا الوفاف الحب طبعك
وارفعيني
نبض قلبي رح يتابعك
طمنيني
واحضنيني بعطف نبعك
لو رياح الصعاب هبت
تسلم العين اللي حبت
تسلم الإيد اللي ربت
يسلم القلب اللي سَمَّى

(*) لحن: محمد قابيل ..
غناء: علي الحجار.

حكاية أميرة (*)

عندى ليكو حكاية
ح نقول لها غنواية
يا للى تقول معايا
تبقى فهمتها..
الحكاية فننى..
كل يوم يغنى..
يسبق التمنى..
يوصل أرضها..
يعشق الأميرة
كبرت الضفيرة
والعيون كتيرة
هايمة فحبها
الأيام بتكبر
والأميرة تكبر
والأحلام بتكبر
مين يوصل لها
قلت ابص بصفة
شفت قلبى لسه

والأميرة حاسة
شدة حُسْنَهَا
مَرَّةً بَعْدَ مَرَّةٍ
شافت الدنيا مُرَّةً
حبت تبقى حرة
سابت عرشها
جت قالت لي فاكرة
نظرتك يا بكرة
قلت يا أحلى فكرة
قلبي يحسها
حبي وشوقي ليكى
ممكن يفتديكى
ترجمى لماضيكى
يا عيون المها
يا أجمل جزيرة
ف بحورى العسيرة
حبك يا أميرة
عمره ما انتهى..

أنا المسافر للسما

أنا المسافر للسما..
يا عيون حبيبتي الملهمة
مسكونى حراس القمر..
بصوا ف عيني المغرمة..
وقالوا عاشق سكته
هية الليالى المبهمة
ف الحب بايع دنيته
وحبيته فأكهة محرمة..
ونخاف عليه يوصل لها
ترجع سفيته محطمة
أنا قولت:
حببت الصعود
وحلفت ما ارجع للوجود
يا إماماً أهلك
أو أعود
وف إيدي زهرة متيمة
قالولى حراس القمر
حيك دا يشبه للقدر

ولا حد قبلك انتصر
مهما استعد أو احتمی
أنا خدت إسمك غنوتی
وعملت صورتك سلوتی
وحضنت أملی
ووحدتی
ورجعت اسافر
للسما

اوعديني (*)

اوعديني بالغرام
أشترى ريكي بالآلام
كل يوم باعشق جديد
وانتى عشقتى ع الدوام

ابدرينى ف المزارع
فرقيني ع الشوارع
واجمعيني سهم بارع
واطلقيني ع الغيام

سفريني ع المراكب
وصليني للكواكب
خرجيني م المواكب
وارحميني م الزحام

عفريني بالتراب
واغسليني بالسحاب
قلبي عشقك واستجاب
انصبريني ع الظلام

حسبى روحى يا هوايا
اسمك انتى ف قلبى آية
قولته طبعاف الحكاية
بس قولته بدون كلام

(*) لحن: أحمد الحجار .

غناء: على الحجار .

باحبك (*)

باحبك وانطلق عصفور
وأسبح ف الهوا والنور
وأملا الكون بأغانينا
ولو كان الجناح .. مكسور
أحبك .. تستكين الريح
ف قلبي ، والأمانى تصيح
بحُبي، واعشق التصريح
ودرّبي ف الضباب مغمور
أحبك .. تبتدى البدايات
تاخذنى .. ضحكك بالذات
تعيدنى .. روح وقلب وذات
تزيدنى .. كشف للمستور
أحبك .. ضى روحى يبان
وأعبر .. ضلمة الحرمان
وأهجر .. غابة الأحزان
واحقق حلمنا المسحور

(*) لحن : أحمد الحجار .

عناء : على الحجار .